

Mbokfaexcuk Ndoetlaeuj Dwklwggjongj Duh'anh

□ Maj Veiungz comz hoiz



▲Diuqfoux biujyienj haiciengz daegsaek yienhda.

Youq Duh'anh Yauzcuz Swciyen mbang yanghcin ndawde, miz cungj fungsug cienzdoengj "mbokfaexcuk Ndoetlaeuj Dwklwggjongj" ndeu riuzcienz mbouj byaiz, gyoengq mbauqsau dangdieg youq seizhoengq doxcomz youq giz ndeu, aeu mbokfaexcuk guh huz guh cenj, baijyienj ok gij angqyangz langhcuengq bouxcoz Bunujyauz, dawz ndoetlaeuj caimax caeuq guhhong ngoenznaengz giethab hwnjdaej, aeu gij vahgangj ndangdaej lai cungj lai yiengh, yienghdoengh daengxdang, fuengsik biujyienj loenghriu haenx, lumjlili dwk baijyienj gij ciengzmienh angqhoh "dwklwggjongj" "ndoet laeuj fiz, da ndi'nduq muengh mbwn, laeuj sinz dwk buhvag dumz" vunz Yauzcuz haenx.

Vunz Bunujyauz Duh'anh dingzlai dwg youq ndaw luegbya, bya sang lueg laeg roen mbouj doeng nem gij vahbonjdeih mbouj doengz haenx, hawj gij fungsug "dwklwggjongj" youq mwh riuzcienz ndawde bienqbaenz mwngz yiengh gou gaiq, mbouj miz aen "hoenz" caezcienz baenzdaug ndeu. Bi 2008 ndwen 2, Ciz Cwngdangz boux dang Duh'anh Vwnzgunghdonz donzcangj, vwnzvagiz fugizcangj gvaq neix, ma daengz mbanjranz Yaau Cin Mbanjdavang, gag ok ngaenz laebbaenz le aen dieggoek hawj vunz-mbanj hag, maeq, cienz minzcuz vwnzva cienzdoengj ndeu—Suenmbanj, doenghfwngz cimhra cingileix "dwklwggjongj" fungsug cienzdoengj. Doengzseiz laebbanh le aen yisuzdonz vunzgunhaz ndeu, daiq gyoengq bouxyienj youq ndaw Suenmbanj baizlien yienjok. De aeu Suenmbanj guh daizheiq, itmienh cimhra cingileix, itmienh baizlien yienjok, caemhcai mboujduenh bae boujcong caezcienz, hawj diuqfoux minzcuz cienzdoengj "mbokfaexcuk ndoetlaeuj dwklwggjongj" ciemh baenz yiengh. Doeklaeng de youh dauqcawq bae cazyawj gij swlhliu doxgven haenx, caemhcai caeuq gij canghheiq laux wng doxcae mumaq, doxyaeng, doq yienj doq gaij, caiq doiq gij vunzmbanj camgya biujyienj haenx guh ndei sonlien, hawj "mbokfaexcuk ndoetlaeuj dwklwggjongj" yisuz cizlieng ndaej daezswng, neiyungz caemh demgya

ndaej ndei, yienj hwnjdaej gig ndeiawj yinx-vunz. Ginggvaq haj bi roengzrengz bae guh, bi 2013 ndwen 12, diuqfoux minzcuz biujyienj "mbokfaexcuk ndoetlaeuj dwklwggjongj" youz Ciz Cwngdangz cimhra cingileix haenx ndaej yamq hwnj gwnz daizheiq Hozciz Si Daih Cibseiq Gaiq Ciet Yisuz Fwen Nyenz Feihvuzciz Vwnzva Yizcanj baijyienj bae, de caemh baengh neix ndaej soengqhawj aen "ciengj cimhra cingileix". Yienznaeuz Ciz Cwngdangz goenglaux gaeng gvaqseiq, hoeng aen diuqfoux minzcuz biujyienj "mbokfaexcuk ndoetlaeuj dwklwggjongj" de cimhra cingileix neix louz roengz caizfouq vwnzva gig dijbauj.

Seizneix, aen diuqfoux minzcuz biujyienj "mbokfaexcuk ndoetlaeuj dwklwggjongj" yiengh foux ndeiawj, loenghriu yinxvunz neix, aeu gij hingzsi diuqfoux fungsug minzcuz cienzdoengj, ndaej deihdeih bin hwnj gwnz daizheiq minzcuz vwnzyi comzyienj, feihyiz vwnzva baijyienj roxnaeuz minzcuz cienzdoengj cietgingq yienh-cienz doenghgi vwnzva hozdung hunghoengh haenx bae, cugciemh baenz Duh'anh Bunujyauz fungsug minzcuz vwnzva cienzdoengj ndawde aen neiyungz youqgaenj noix mbouj ndaej ndeu, baenz le gaiq "baizgim" cienzboq Bunujyauz vwnzva ndeu.



▲Hwnj daizheiq hung biujyienj.



▲Laeuj van hom daengx ciengz.



▲Niemh laeuj van vunz sim'angq.



▲Laeuj van vunz angq dang vuenyungz.



▲Laeuj fiz sim mbouj fiz.